

Tujuh premis makanan kotor diarah tutup

oleh NIK AMIRULMUMIN NIK MIN 11 Ogos 2022 11:03am **Masa membaca: 2 minit**



Keadaan ruang premis (kiri) dan juga peralatan yang dikesan berada dalam keadaan kotor dan menjijikkan ketika pemeriksaan dalam Operasi Gempur Premis Makanan MBK yang dilaksanakan sejak 7 Ogos lalu. - Foto FB MBK

KUANTAN - Sebanyak tujuh premis makanan di daerah ini diarah tutup selepas dikesan berada dalam keadaan kotor dan tidak mencapai standard kebersihan ditetapkan.

Arahan penutupan premis selama tiga hari itu dikeluarkan Majlis Bandaraya Kuantan (MBK) bawah Seksyen 72 Akta Kerajaan Tempatan 1976 (langkah perlu bagi menjamin kesihatan awam).

Ketua Seksyen Perhubungan Awam dan Korporat MBK, Nor Kamawati Kamal berkata, kegagalan segelintir peniaga makanan mematuhi peraturan berkait aspek kebersihan premis itu dikesan dalam Operasi Gempur Premis Makanan MBK yang dilaksanakan sejak 7 Ogos lalu.

Menurutnya, dalam operasi itu, sebanyak 71 premis telah diperiksa dan segelintir peniaga didapati langsung tidak mengendahkan peraturan berkaitan kebersihan yang telah dikeluarkan pihak MBK sebelum ini, malah ada yang melakukan kesalahan berulang.

"Sebanyak 59 kompaun telah dikeluarkan di bawah Undang-undang Kecil Kawalan dan Penyeliaan Tempat Makanan (MPK) 1983.

"Turut dikeluarkan 10 notis peringatan dan arahan melaksanakan kerja-kerja pembersihan kepada premis-premis yang ingkar ini," katanya ketika dihubungi pada Khamis.

Mengula lanjut katanya, pemeriksaan ke atas lebih 2,000 premis makanan di sekitar Bandaraya Kuantan akan diteruskan dari masa ke masa bagi memastikan kesihatan dan kesejahteraan awam terjaga.

Beliau berkata, pemeriksaan secara berterusan itu juga bertujuan untuk mendidik warga penjaja dan peniaga supaya mengamal dan mengutamakan kebersihan di premis masing-masing pada setiap masa.